

BONEIRO BAO ALERTA PA MENASA MILITAR VENEZOLANO



WWW.SOLODIPUEBLO.COM



SOLODIPUEBLO@GMAIL.COM

2 AÑA DI PRISON EXIGI PA CHOFER DI AUTO BOU INFLUENCIA CU A OCASIONA ACCIDENTE FATAL

PROME MINISTER EVELYN WEVER- CROES TA ANUNCIA RETIRO DI GABINETE WEVER-CROES II




MIKE DE MEZA CU UN DISCURSO DESTRUCTIVO Y VENGATIVO

ARUBA TA TRIUNFA 2-1 CONTRA CAMBODIA DEN PARTIDO AMISTOSO INTERNACIONAL



NA HATO BIENTO FUERTE A MANDA CICLISTA RIBA UN QUADRACER MANDANDO ESAKI RIBA UN AUTO DEN TRAFICO CONTRARIO



Diaranson mainta a drenta informe di un accidente cu hende herida pabao di rotonde Hato, mesora a dirigi polis y ambulans pa e sitio. Casualmente un patruya y tambe ambulans tabata pasando y nan a atende cu e accidente aki. A bin compronde cu aki un ciclista riba bicicleta electrico a keda pusha dor di biento riba un quadracer riba caminda mandando esakinan bay dal den banda di un auto den trafico contrario. Debi na e impacto e ciclista a wordo tira for di su bicicleta y a resulta herida. Tambe e manehador di e quad a resulta levemente herida debi na e impacto na banda di e auto. Ambulans a atende ambos herido na e sitio mes.



DOS DAMA HERIDA DEN ACCIDENTE DI AUTO NA PIEDRA PLAT



Piedra Plat - Diahuebs mainta altura di Jontai Hardware a sosode un accidente entre dos auto, unda cu den un di e autonan brandweer mester a presenta pa habri porta.

Polisnan cu a yega a bin

topa cu un Mitsubishi y un Honda.

Mirando cu 2 dama den e Honda a resulta herida a pidi pa dos ambulance. Dado momento e Paramediconan cu a yega pero lo a confronta

problema pa saca e heridonan a solicita pa brandweer.

Bomberonan mester a corta un porta pa asina saca e heridonan, cu no tawata musta grave.

Paramediconan di ambos ambulance a tuma nan over y despues sali direccion Hospitaal.

Comisario di polis Sr.Arnhem tambe a presenta na e sitio hunto cu polisnan di trafico y Forensys.



Prome Minister Evelyn Wever-Croes:

PROME MINISTER EVELYN WEVER-CROES TA ANUNCIA RETIRO DI GABINETE WEVER-CROES II

“Masha danki pa e oportunidad di por a sirbi Aruba como bo Prome Minister y cu Dios bendiciona cada ciudadano di nos pais”

Diahuebs mainta 27 di Maart 2025, Prome Minister Evelyn Wever-Croes tabata den Parlamento na unda el a tuma e oportunidad di anuncia e retiro di Gabinete Wever-Croes II y duna gradicimento na tur esnan cu di of otro manera a duna gobierno e sosten pa goberna den e ultimo 7 aña y mei.

Prome Minister ta gradici henter pais Aruba pa a dun’e e oportunidad pa goberna e pais aki, tur su coleganan minister di Gabinete Wever-Croes I y II, tur medionan di prensa pa a haci posibel pa e mensahe yega caminda e mester yega, Parlamento cu semper tabata habri pa atende e gabinete, tur esnan cu a traha cu e gabinete, y tur hefe di departamento pa nan cooperacion. Principalmente e mandatario ta gradici cada ciudadano di pais Aruba, pa a permiti su persona di ta nan

Minister President den e ultimo 7 aña y mei y pa por a representa cada un di nan na Aruba y den exterior, y cu awe hunto nos por mira atras riba logronan grandi.

E mandatario a indica cu berdad Gobierno no a logra tur locual nan a propone nan mes, pero nan a logra cosnan grandi den e temporada mas dificil cu e pais aki a pasa aden, den historia moderno di pais Aruba.

“Mi ta kere cu e resultadonan ta papia pa nan mes ya cu nan ta wordo reconoci pa instancianan internacional y local y pa institutonan internacional financiero cu ultimo a bolbe “upgrade” Aruba.

Y manera un señora di Paradera a bisami; “Mi yiu bo a haya e pais cu un MEGA DEBE y bo ta bay lague cu un MEGA SURPLUS” di cual mi a respond’e cu esaki ta hacimi

MEGA ORGUYOSO. Y esaki ta e legado cu nos ta laga atras. Mi tin un relato annual di mi ministerio di cada aña cu ta pone e legado aki graba den historia y no por bay perdi

Mi kier felicita tur e Parlamentarionan nobo cu a caba di huramenta y esnan cu lo mester huramenta ainda hopi exito, y hopi sabiduria. Mi kier desea e gobierno nobo hopi sabiduria y exito y cu ohala boso por wordo guia na pone e interes di pais Aruba semper na prome luga paso ta asina so por garantisar un bon gobernacion.

Nos pais ta un pais bendiciona, Dios tin plannan grandi pa Aruba y loke nos mester haci ta tin fe, traha duro y sostene otro, paso nos a demostra durante pandemia cu uni nos por logra hopi.

Nos ta preparando un traspaso debido di Gabinete Wever-Croes II



na e Gabinete nobo. Cada minister a prepara su traspaso cual ta hacimi hopi orguyoso, paso asina bo ta demostra cu bo a goberna na drechi y bo ta sali na drechi. Masha danki pa e oportunidad di por a sirbi Aruba como bo Prome Minister y cu Dios bendiciona cada ciudadano di nos pais” Prome Minister a termina bisando.

Clasificados

SOLODIPUEBLO@GMAIL.COM

CEL.585 9500

<div></div> <div>Corte di Prome Instancia 28 maart 2025</div>		
Horario	Sospechoso	Acto Castigabel
08.15	T.P. J.A.R.A.	Uitspraak.
08.30	Z.I.T.	T. ta wordo acusa di intento di homicidio y posesion di un arma di candela riba 9 di mei 2024.
10.30	D.Mc.I.P.	P. ta wodo acusa di a viola ley di droga riba 10 di september 2024.
11.30	G.M.P.	P. ta wordo acusa di di destruccion y ladroncia riba 3 di oktober 2024.



Noticia di Corte

2 AÑA DI PRISON EXIGI PA CHOFER DI AUTO BOU INFLUENCIA CU A OCASIONA ACCIDENTE FATAL-1-

Awe mainta Corte di Husticia a trata e caso penal cu Ministerio Publico a cuminsa contra e homber B.E.H. (26). E ta wordo acusa cu riba 11 October 2023, a ocasiona un accidente serio riba e cruzada di LG Smith Boulevard y Adiraan Lacle Boulevard cu consecuencia cu 4 dia despues, e dama Gutierrez (21), riba e brommer BMW a fayece mientras cu e chofer di e brommer, Kelly, tabata hopi grave y mester a wordo hiba cu air ambulance pa exterior.

SOLO DI PUEBLO por a compronde cu Fiscal ta haya B.E.H. culpabel y a exige 2 aña di prison di cual 30 luna ta condicional y 3 aña sin rijbewijs.

Den tribuna di sala di Corte, por a mira cantidad di persona den tribuna. Algun ta famia di e acusado y algun ta famia di e victima Kelly y e fayecida Gutierrez. Por a mira cu e victima Kelly tabata hopi emocionada. Su familiar a bisa Hues cu no a keda cla cu e demanda di daño pero cu lo bay cuminsa un caso civil. Señora Gutierrez, mama di e fayecido, tambe tabata presente y su abogado mr. Odor a haci demanda di daño.

ACCIDENTE

Durante tratamento di e caso, B.E.H. a splica na Hues kico a pasa dia 11 October 2023. B.E.H. a bisa cu e tabata cu algun amigo pa celebra cumpleaños di un persona na beach. Despues el a dicidi di bay serca mama di un amigo kende tambe a haci aña. E tabata den un KIA Picanto riba LG Smith Boulevard y na e cruzada cu

Adriaan Lacle Boulevard, e accidente a sosode. Hues a puntra B.E.H. si el a bebe. El a bisa cu el a bebe 1 cerbez y 2 cups di rum coke. Hues a remarca cu Polis a constata mas di 700 microgram den rosea di B.E.H. cu ta mucho mas cu loke B.E.H. ta bisa di a bebe. B.E.H. a bisa Hues cu e no sa cuanto rum nan a tira den su bebida. Segun B.E.H., despues di 1 ora na beach, el a bay core auto y e tabata sinti bon pa core. Hues a remarca cu hopi biaha, hende bou influencia ta sinti nan hopi bon. Hues a mostra cu segun Polis, B.E.H. tabata hole alcohol y su wowonan tabata blink. Hues a bisa cu tin video di loke a sosode y cu por mira cu B.E.H. a bira pa dreña den Adriaan Lacle Boulevard ora cu un brommer BMW tabata biniendo riba LG Smith Boulevard. Segun B.E.H. e brommer tabata leu. Hues a puntra, si e alcohol lo por a influencia e calculo di B.E.H.

Segun B.E.H., tabata hopi scur na e cruzada y pesey el a tuma e birada cortico pa dreña Adriaan Lacle Boulevard. Hues a bisa cu segun investigacion, e brommer tabata core 137 km pa ora. Esey ta hopi duro. Hues a bisa cu tin testigo a declara cu e KIA a coy e birada chikito, tuma un chens, pa asina pasa promer cu e brommer pasa. Hues a puntra B.E.H., kico e accidente a causa p'e. El a bisa cu el a keda cu trauma. Hues a puntra B.E.H. si el a tuma contacto cu e famia di e victima. B.E.H. a bisa no y cu e tin un conoci cu conoce e famia. El a bisa cu e lo kier tin contact cu e famia si ta posibel. Ta asina cu

door di e accidente, e auto a keda confisca y a kita B.E.H. su rijbewijs. Durante e hacimento di pregunta di parti di Hues a sali na cla cu B.E.H. ta trahando na un instancia financiero y mester di su rijbewijs pa por bay traha.

MAMA DI VICTIMA A PAPIA

E mama di e victima, señora Gutierrez a hiba palabra. El a bisa Hues pa B.E.H. papia e berdad. E mama, hopi emocionada a bisa Hues cu door di e accidente, el a perde su yiu muher (21). El a bisa Hues cu e dia ey su yiu a caba di traha y tabata bayendo cas. El a expresa cu ta su unico yiu muher. E mama a remarca cu e hecho cu B.E.H. a bebe, e mester sa cu e por a causa e accidente. E mama hopi emocionada a bisa cu ya ta 1 aña y 5 luna cu su yiu muher a fayece. E mama tabata insisti cu no tabata solamente un accidente.

CHOFER DI BROMMER TA RECLAMA

E chofer di e brommer, Kelly, tambe a papia. El a bisa Hues cu B.E.H. a bin cu un bon storia. El a bisa Hues cu e tabata coriendo un brommer BWM cu luz Led y muffler cu ta zona duro. Esey ta haci cu ta imposibel cu B.E.H. no a mira ni scucha e brommer. Na opinion di Kelly, B.E.H. a bira su dilanti y el a dal frontal no den banda. Hues a hala Kelly su atencion cu e mester papia como victima y no critica kico lo a pasa. Kelly a bisa Hues cu loke a pasa a laga e y su famia y e mama di e difunto y su famia afecta.

Continuacion pag 6

CHAUFFEUR DI UN SUZUKI SWIFT NO A REGULA SU VELOCIDAD NI A MANTENE DISTANCIA A BAY DAL TRAS DI UN BUS DI AGW

Diaranson mainta a dreña informe di un accidente riba Caya Frere Alexius, mesora a dirigi un patruya na e sitio. Na yegada di e patruya a bin compronde cu aki ta trata di un accidente unda cu e chauffeur di un Suzuki Swift no a regula su velocidad ni a mantene distancia a bay dal tras di un Bus Hyundai di AGW Tours. Afortunadamente ningun hende a resulta herida.



HURAMENTACION 5 MIEMBRO NOBO DI PARLAMENTO

Diahuebs 27 di maart 2025 a tuma luga e huramentacion di e cinco miembronan nobo di Parlamento na Cas Ceremonial di Gobernador. Nan ta reemplasa e cinco miembronan di Parlamento cu lo ocupa un puesto di Minister. E miembronan nobo di Parlamento ta e siguiente personanan:

Señor Carlos Bermudez

Señor Marlon Sneek

Señora Otami Thomasia

Señora Muzaninn Wever

Señora Ruthlyn Lindor

E miembronan di Parlamento a huramenta dilanti di Gobernador di Aruba, Su Excelencia Alfonso Boekhoudt. E obligacion di e miembronan di Parlamento pa huramenta of haci promesa prome cu acepta nan puesto, ta regla den articulo III.11 di e Constitucion di Aruba. retnan: © Kabinet Gouverneur Aruba



BONEIRO BAO ALERTA PA MENASA MILITAR VENEZOLANO

Boneiro a expresa preocupacion tocante e posibel menasa militar for di Venezuela. Segun un publicacion reciente, autoridad Boneriano a sinti un aumento den actividad militar Venezolano cerca di nan frontera maritimi, loke ta pone un presion riba e seguridad regional.

E situacion politico instabil na Venezuela ta crea un ambiente tenso, loke ta preocupa e region. Un melding reciente di Wardacosta di Caribe Hulandes a indica e falta di democracia y di un estado di derecho na Venezuela, haciendo e pais un factor imprecindibel, cu tin implicacion p'e isla nan di Caribe Hulandes, incluyendo Aruba, Corsou y Boneiro.

Fuera di esey, e tensionnan entre Venezuela y Guyana a aumenta recientemente,

despues di presencia di un bapor militar Venezolano cerca di un plataforma di ExxonMobil den e awa disputa. E situacion aki ta contribui na un ambiente di tension den e region Caribense.

Autoridad di Boneiro ta pidi atencion urgente di e comunidad internacional pa monitor e desaroyonan na Venezuela y pa tuma e medidanan necesario pa garantisar e seguridad y estabilidad di e isla y di e region mas aleu.

Tambe, mirando e desaroyo aki, Reino Hulandes mester tira un extra bista p'asina pone mas sosten militar pa proteccion di nos islanan, ya cu nos ta cay bao di nan proteccion. Ta di keda pendiente kico lo sosode den e proximo dianan encuanto e situacion sumamente fatioso aki.



2 AÑA DI PRISON EXIGI PA CHOFER DI AUTO BOU INFLUENCIA CU A OCASIONA ACCIDENTE FATAL-2-

Continuacion di Pag 4

FISCAL A EXIGI 2 AÑA DI PRISON

Fiscal a bisa Hues cu e accidente aki a conmove henter comunidad. El a muestra cu Kelly tabata maneha su brommer y B.E.H. a bira su dilanti sin duna preferencia. Esey a causa un accidente caminda e dama Gutierrez (21), cu tabata sinta patras riba e brommer, a muri algun dia despues. Kelly tabata grave y e mester a bay cu air ambulance pa tratamiento.

Fiscal ta di opinion cu B.E.H. no intencional a kita biba di e dama. Fiscal ta haya cu B.E.H. a causa un accidente cu consecuencia cu e dama a fayece. Fiscal a bisa cu e caminda tabata suficiente ilumina. Ta un hecho cu B.E.H. no a duna preferencia na e brommer y a bira mucho liher pa subi Adriaan Lacle Boulevard y no a duna preferencia na e brommer. Fiscal a muestra cu Polis a constata cu B.E.H. tabata bou influencia di alcohol. B.E.H. a admiti di a bebe. Fiscal a remarca cu B.E.H. ta bisa cu e no a mira e brommer. Sinembargo tin testigo ta bisa cu a mira e brommer ta bin cu velocidad halto y cu B.E.H. a tuma un chens bira liher. Fiscal a bisa cu tin imagennan di video di seguridad caminda ta mira cu e brommer tabata core cu velocidad halto y cu e KIA a bira su dilanti. El a remarca cu riba e caminda ta permiti pa core 50 km siendo cu e brommer tabata core 137 km. Fiscal ta haya cu door cu B.E.H. no a duna preferencia, a causa morto di Gutierrez. Fiscal a tuma B.E.H. na malo cu e no tabata

mas cauteloso pa mira na unda e mester a bira y para y laga e brommer pasa. Fiscal a bisa cu ta un hecho cu e brommer tabata core hopi halto pero tin hurisprudencia cu ta muestra cu no por bisa cu door di e coremento duro di e brommer, e accidente a sosode.

Fiscal ta haya cu aki no por papia di cu intencional B.E.H. a causa accidente sino cu door di su culpa. Fiscal a bisa cu mester tene cuenta cu e brommer tabata core hopi duro. Pero mas serio ta e hecho cu B.E.H. tabata hopi bou influencia. Pa cu e castigo, Fiscal a tene cuenta cu ta promer biaha cu B.E.H. ta cay sera. E auto a keda confisca. Fiscal a exige 2 aña di prison pa B.E.H. di cual 30 luna ta condicional cu 2 aña di prueba. Tambe Fiscal a exige cu e rijbewijs ta keda kita pa 3 aña.

ABOGADO TA CUESTIONA BROMMER

Abogado mr. Emerencia a bisa Hues cu esaki ta un accidente tragico. Na opinion di abogado, contrario cu Fiscal, e no ta haya cu B.E.H. so ta culpabel sino e brommer tambe. E causa di accidente a sosode despues di 12'or di anochi. Investigacion ta muestra cu e brommer tabata core hopi duro y dal den banda di e KIA, cu consecuencia cu e dama Gutierrez a fayece algun dia despues. E abogado ta haya cu door di e velocidad halto di e brommer, e consecuencia di e accidente tabata asina grave. El a remarca cu si e brommer tabata core 50 km, stipula pa ley, lo no tabatin un accidente asina grave. E ta haya cu e chofer di brommer ta mes responsabel.

E abogado a bisa cu ta conoci cu riba e cruzada LG Smith Boulevard y Adriaan Lacle Boulevard ta scur. Anochi, ta dificil pa mira bon con pa bira subi Adriaan Lacle Boulevard. El a bisa Hues cu net ey banda tin un oficina di abogado cu tin luznan hopi cla. Esaki ta haci cu B.E.H. no por a mira e luz di brommer. Segun abogado, investigacion ta muestra cu den 6 seconde e brommer a dal contra e auto cu tabata birando. Na opinion di abogado, B.E.H. tabata mira unda cu e tabatin cu bira y e brommer a dal contra dje. El a bisa cu na Aruba ta conoci cu e cruzada ey ta sumamente peligroso y varios accidente fatal a sosode eyan. El a muestra cu tin testigo, cu tabata core cu bentana habri, cu a bisa cu no a scucha e brommer. E abogado a bisa Hues cu e brommer BWM tabata core hopi duro. Na opinion di e abogado, e brommer tabata core mas duro cu 137 km cu Fiscal a bisa. E abogado ta calcula cu e brommer tabata core 150 km, teniendo cuenta cu e especificacionnan di e brommer. Mr. Emerencia a bisa Hues cu e hecho cu B.E.H. a sende luz di direccion, baha velocidad, ta muestra claramente cu e tabata core cauteloso. Na opinion di abogado, no pasobra cu B.E.H. tabata bou influencia di alcohol, sino cu e cruzada tabata hopi peligroso, cu e tabata core asina cauteloso y no tabata sa kico e tabata haci. Abogado ta haya exigencia di Fiscal exagera. El a pidi Hues pa duna castigo combina cu multa of trabao pa comunidad pa asina B.E.H. no mester bay sera.

DISLEXIA Y DOORSTROOMTOETS

Mirando cu e doorstroomtoets pa scol basico ta den porta, nos como Fundacion pro Persona cu Dislexia ta desea di informa/corda e mayornan y e cabesantenan di scol basico lo siguiente: Tin cu tene na cuenta cu un mucha cu tin dislexia tin derecho di haci su doorstroomtoets adapta segun su limitacion.

E adaptacion ta individual teniendo cuenta cu e necesidad di e mucha.

Aki nos ta manda algun forma di adaptacion cu ta posibel pa e doorstroomtoets 2024 – 2025 (segun criterio di Rijksoverheid):

- Un version cu letter mas grandi
 - Un forma di asistencia auditivo
 - Extra tempo pa e mucha por traha riba e doorstroomtoets
- Nos ta spera cu e scolnan basico lo tene consideracion cu e muchanan cu dislexia y ta corda nan cu ta un derecho di e mucha pa haya ayudo y facilidad den su estudio.

Pa mas informacion, por tuma contacto via e-mail na: fundacionprodislexia@gmail.com of via e number di celular/whatsapp 566 0140.



Parlamentario Rocco Tjon:

MIKE DE MEZA CU UN DISCURSO DESTRUCTIVO Y VENGATIVO

Awe durante reunion publico caminda a trata retiro di ministernan di Gabinete Wever-Croes II y nombracion di Gabinete AVP-Futuro, por a tuma nota di un Mike de Meza hopi vengativo, frustra y yena cu odio.

DISCURSO DI PARLAMENTARIONAN
Durante e reunion aki tur parlamentario di tur fracion a hiba discursonan positivo y elocuente. Sr. Heyliger a elogia Minister president pa trabounan

cu el a haci riba tereno di posiciona e hende muher mas den nos comunidad. Sra. Arends-Reyes a gradici ful gabinete saliente pa e trabounan desplega na bienestar di pais Aruba. Ademá, sr. Bermudez y Goeloe a gradici pero alabes a boga pa un politica nobo den Parlamento, uno di cooperacion y uno constructivo na bienestar di pais Aruba.

DISCURSO MIKE DE MEZA
Despues di e discursonan

di varios miembro di Parlamento sr. Mike de Meza a hiba palabra y no solamente insulta e ministernan saliente, pero tambe a tuma e oportunidad pa menasa cu nan lo bay investiga y persigui tur ex-minister unabes cu AVP yega na mando y cu esaki lo cuminsa dialuna benidero. Claramente, de Meza no tin ningun interes den bon gobernacion y mucho menos un trato di respet pa otro coleganan. Mientras cu e ta hiba su discurso



nos por a tuma nota di e caranan di miembronan di Parlamento di Futuro y AVP cu hopi berguensa y decepciona. Mike de Meza ta haci como si fuera e hecho cu e no a

pasa screening ta culpa di ful mundo menos di dje. Ta danki na su propio comportacion pa loke ta trata "belasting" awe e no por a pasa screening!

PODCAST NOBO DI DNM "CADUSHI TA ZONA CU DYRICK" AWENOCHI 7:00PM

Oranjestad, Aruba – Manera ta conoci Directie Natuur & Milieu (DNM) a anuncia e lansamento di e serie di podcast "Cadushi ta Zona cu Dyrick" siman pasa. Un podcast nobo dedica na entre otro educa y envolv'e comunidad local tocante Aruba su medio ambiente, naturalesa, conservacion, herencia cultural, desaroyo sostenibel, salubridad y nan conexion vital y mucho mas.

Awe, diaheubs 27 di maart 2025 pa 7:00pm e prome episodio "Naturalesa y su importancia" lo ta accesibel riba rednan social di DNM como tambe riba plataformanan di Youtube y Podcast. E serie, "Cadushi ta zona cu Dyrick", ta presenta door di Dyrick Wouters, un hoben curioso y pasiona cu Aruba su naturalesa y herencia cultural. Nos ta invita grandi y chiquito pa sintonisa e serienan aki y asina bay riba un biahe hunto cu Dyrick, cu ta explora

Aruba su biodiversidad, tradicion, esfuerzo pa conservacion y retonan ambiental. Den e prome episodio Dyrick ta combersa cu sr. Gisbert Boekhoudt- Director, Yahaira Jansen -Onderzoeker y Nadine Da Silva- Beleidsmedewerker na DNM. E combersacion ta bay over di Aruba su Naturalesa y su importancia. Sigur un episodio hopi interesante cu ta captura atencion.

E podcast ta accesibel entrante awe 7:00pm riba plataformanan manera Spotify, Apple Podcast, tambe riba e rednan social manera Facebook, Instagram y YouTube channel di DNM. E fantastico di e podcast ta cu por bay scucha of wak e episodio aki ora ta conveni bo. Ta encurasha un y tur pa bay 'subscribe' na e canalnan di DNM riba e diferente plataforma nan menciona pa asina no perde niun episodio di "Cadushi ta zona cu Dyrick". Lo tin un episodio nobo



cadushi ta zona
cu Dyrick

Diahuebs 27 di maart 7:00pm

Episode 1
Naturalesa y su importancia

Sintonisa e podcast nobo "Cadushi ta zona cu Dyrick" unda e hoben Dyrick ta combersa cu diferente stakeholder tocante e balor di naturalesa y con nos por incorpora e balor aki den nos bida.

Wak e Vodcast via:

Scucha e audio via:

dnm.aruba.org

cada dos siman riba diaheubs pa por scucha of wak, Asina bo tambe por haya sa mas di Aruba su ecosistema unico, con pa conserva nos fauna, efecto di

cambio di clima pa Aruba y con turismo sostenibel ta beneficioso pa Aruba y con esaki ta aporta na mantencion di nos identidad cultural, y hopi mas.

CBA A TENE “BAN TOPA” NA ROTTERDAM



Den Haag – Na Rotterdam a tuma lugar awe 27 di maart un encuentro di Banco Central di Aruba (CBA). E “Ban Topa” aki ta pa brinda informacion na Arubianonan bibando na Hulanda riba oportunidadnan di trabao na Banco Central di Aruba.

Presente na e evento aki tabata directora di Gabinete di Aruba Joselin Croes y coordinador di departamento di Bienestar General di Gabinete di Aruba Nuris Dabian.

E merdia a cuminsa cu programa cu diferente



presentacion nan unda a bisa e proposito di e Ban Topa aki, cu ta pa conecta cu estudiante y profesionalnan hoben; duna un bista cual tipo di funcionnan CBA ta busca y crea oportunidadnan pa networking. Actualmente CBA tin 22 posicion habri unda nan ta busca hende pa yena nan.

Presidente di CBA Jane Semeleer a duna un presentacion riba e CBA como organizacion y operacion di CBA. Señora Semeleer a accentua den su presentacion e scarsedad

di personal na Aruba y su efecto grandi pa cu CBA y a haci un apelacion riba e hobennan presente pa considera pa regresa Aruba.

Tambe durante di e presentacion a duna un bistaclaribaecondicionnan di trabao na CBA, e beneficianan secundario cu CBA ta brinda y tambe e posibilidadnan pa crece den bo carrera profesional na CBA.

Despues di e presentacion e bishitantenan di e “Ban Topa” aki por a intercambia

cu functionarionan di CBA riba posibilidad di un carrera profesional na CBA. E delegacion di CBA – enbabesa pa president di CBA Jane Semeleer – ta na Hulanda pa participa pa e bolsa Nationale Carrière Beurs cu lo tuma lugar fin di siman aki na RAI na Amsterdam.

Banda di e “Ban Topa” na Rotterdam, CBA a tene tambe un encuentro similar na Amsterdam. Nota pa redaccion: E potretnan ta cortesía di Arubahuis

ENSEÑANSA PA EMPLEO, UN INSTITUCION CARGA DOOR DI PUEBLO Y APOYA PA E MERCADO LABORAL

Enseñansa pa Empleo desde 1988 ta percura pa cursonan pa recapita nos hendenan. Cierre di Lago a trece hopi desafio pa nos pais y nos pueblo. Hopi hende a keda sin trabou. Hopi hende a bandona nos pais. Y esnan cu tabatin nan especialidad den refinaria a haya nan mes diripente sin trabou y sin posibilidad pa un otro trabou. Adicionalmente, Aruba e tempo aya a cuminsa concentra mas den desaroyo hotelero y turistico pues un cambio

total di ofishi. Pa e motibo aki cu na 1988 a lanta “Enseñansa pa Empleo” cu mester a percura pa recapitacion di nos hendenan cu a perde trabou den refinaria di LAGO.

Desde e tempo ey, hopi cos a cambia, EPE a cuminsa concentra pa recapita tur persona cu tabata tin e interes pa re-educar, siña mas of crece mas den nan bida profesional. Enseñansa pa Empleo tambe ta wordo yama cu cariño y orguyo ta door di

pueblo, stakeholders y su staff “EPE”.

Temporada 2018 pa 2022: Pa un temporada (2018-2022) EPE a cuminsa perde visibilidad den comunidad, te ora cu na 2022 EPE a pasa over di e ministerio di Enseñansa pa e ministerio di Labor.

Ora a cuminsa reconstrui EPE durante 2022, sra. Sabine de Groot a tuma e reto pa bira “Kwartiermaker” pa EPE y pa pone EPE bek den e comunidad cu a haya


falta di Enseñansa pa Empleo su servicionan. A wordo dicidi cu EPE mester keda accesibel pa tur hende den comunidad cu tin interes pa recapita of siña mas y cu preisnan atractivo y pagabel pa tur hende.

Durante e aña 2022 no solamente mester pensa riba con por hiba EPE back den comunidad, pero sigur EPE mester a haya un “make-over” grandi. Klas-lokaaln tabata tin mesa- y stoelnan di plastic



cu no tabata apto pa usa pa participa den e cursonan. Hasta inscripcion y registracion tabata ser hasi manual mas tambe e edificio no tabata cla pa ricibi publico.

ARUBA TA TRIUNFA 2-1 CONTRA CAMBODIA DEN PARTIDO AMISTOSO INTERNACIONAL



Phnom Penh, Camboya – 25 di Maart 2025 – Aruba a logra un victoria importante na un amistoso internacional contra e pais anfitrión, Cambodia, diamars 25 di Maart na Olympic Stadium den Phnom Penh. E partido, cu un publico total di 9,345, a culmina cu un 2-1 a favor di Aruba.

Aruba a habri e marcado tempran, a logra su prome gol despues di tres minuut. Un corner bon coloca pa Rovien Ostania, Walter Bennett ta kop e bala pasando e keeper Cambodia, dunando Aruba un bentaha di 1-0.

E bishitante a sigui presiona, y den minuut 11, Aruba a dobla su bentaha. Un cruce perfectamente ehecuta pa Kymani Nedd

a haya Rovien Ostania, cu a kop e bala den e gol, poniendo Aruba 2-0 ariba. Cambodia, cu presion di logra bin bek den wega a keda na desbentaha den minuut 42 ora cu Yudia Ogawa di Cambodia a recibe un carchi geel despues di un hugada bruto, y despues ta dal Terrace Groothusen cu cabes den pecho y ta recibi un carchi cora direct. E incidente a laga e ekipo local cu solamente 10 hungado pa e resto di e partido.

Den dos mita, Cambodia a logra un gol pa reduci e marcado na minuut 57. Un tiro di Nick Taylor ta dal den hungado di Aruba Diederick Luidens, y ta resulta den su mesun gol,

poniendo e marcado 2-1. A pesar di nan esfuerzo, Cambodia a topa cu otro obstaculo den minuut 90, ricibiendo otro carchi cora. Aruba a mantene su liderato pa termina e partido cu un score di 2-1. E victoria aki ta un momento importante pa Aruba mientras e ta prepara pa su proximo desafío clasificacion Concacaf caminda pa copa mundial 2026. Aruba lo enfrente Barbados den un partido afo 4 di Juni, sigi pa un partido na cas contra Haiti dia 7 di Juni.


Proximo Partido:

- 4 di Juni 2025: Partido afo di cas contra Barbados
- 7 di Juni 2025: Partido na cas contra Haiti















Den number di Fundacion Mi Cutisa, aki mi ta manda boso un relato di nan actividad, pa loke ta trata nan celebracion di 20 aña

MASHA DANKI PA BOSO TREMEMENDO PROMOCION, Nos ta aprecia Oranjestad. Celebracion di 4 lustro - Fundacion Mi Cutisa





Paardenbaaistraat 10, Oranjestad, Aruba Tel.: (297) 525 - 7555
www.lottoaruba.com
Resultado: Sorteo di Merdia - March 27, 2025

 <div>Sorteo # 4576</div> <div>4641</div> <div>9924</div> <div>1519</div> <div>X2</div> <div>BIG 4</div> <div>Sorteo # 4576</div> <div>6418</div> <div>FP</div> <div>DFF</div> <div>Sorteo # 2632</div> <div>8709</div> <div>ZODIAC</div> <div>Sorteo # 4576</div> <div>1853</div> <div>Libra</div> <div>LUCKY 3</div> <div>Sorteo # 1450</div> <div>621</div> <div>X3</div>	<div><div>Sorteo #</div><div>0 x Jackpot</div><div>0 x Match 4+</div><div>0 x Match 4</div><div>0 x Afl. 12,00</div></div> <div>Joker Letter</div> <div>Proximo Jackpot</div> <div>230.000,-</div>	<div><div>Sorteo #</div><div>0 x Jackpot</div><div>0 x Match 4</div><div>0 x Afl. 8,00</div></div> <div>Proximo Jackpot</div> <div>51.000,-</div>	<div><div>Sorteo #</div><div>0 x Jackpot</div><div>0 x match 4</div><div>0 x Afl. 500,00</div><div>0 x Afl. 50,00</div><div>0 x Afl. 15,00</div></div> <div>Mega Ball</div> <div>Proximo Jackpot</div> <div>320.000,-</div>	<div><div>Sorteo #</div><div>0 x Jackpot</div><div>0 x match 4</div><div>0 x Afl. 500,00</div><div>0 x Afl. 50,00</div><div>0 x Afl. 15,00</div></div> <div>Afl. 460.000,-</div>	<div><div>Sorteo #</div></div> <div></div>
--	---	--	--	---	--

Dia 10 di maart 2005 sra Imelda Eckmeyer hunto cu su yiu Mavis Krozendijk-Eckmeyer a lanta Fundacion Mi Cutisa (FMC). Despues di 20 aña directiva di FMC a conmemora e añanan di nan existencia den Centro di Bario Noord (CBN), hunto cu mayoria boluntario kendenan durante tur e añanan cu a pasa a yuda y coopera di un forma of otro. FMC ta un di e organisacionnan cu tbt nomina nan boluntario di aña pa haya un reconocimiento di Cede Aruba. Asina te cu 2021, FMC a nomina cuater boluntario sin cu nan tawata sa cu nan a keda nomina. Durante e encuentro di 20 aña FMC, presidente di FMC sra Lourdes Martis-Bermudez hunto

cu manager di Museo Cas Tan Tin sr Richard Tromp, a informa tur presente cu directiva di FMC lo bay sigui cu e tradicion di nombra nan boluntario di aña. E biaha aki e tabata un sorpresa pa sra. Norah Eckmeyer y sra Bertha Wolff-Croes, kendenan a haya e reconocimiento como Boluntarionan di Aña 2023-2024. Consehera di FMC, sra Ruby Eckmeyer, a duna un charla riba e topico di Fotografia den Trahe Tipico na Museo Cas Tan Tin. Tabata un atardi cu hopi informacion, dialogo y intercambio di idea. FMC ta bisa DANKI na tur nan boluntarionan, tambe na un y tur cu a participa na e tantisimo actividadnan di FMC durante e 20 añanan cu a

pasa y na tur compania cu semper a sostene FMC. Na un y tur cu ta desea di sigui contribui cu FMC por buska riba Facebook e video di 'Amigonan di Museo Cas Tan Tin' y sigui e instruccionnan. Por scohe pa bira un amigo di Brons, Plata of Oro di Museo Cas Tan Tin y asina yuda conserva nos Herencia Cultural Tangibel y Intangibel na Aruba.



PODCAST NOBO DI DNM

“CADUSHI TA ZONA CU DYRICK”



Oranjestad, Aruba – Manera ta conoci Directie Natuur & Milieu (DNM) a anuncia e lansamento di e serie di podcast “Cadushi ta Zona cu Dyrick” siman pasa. Un podcast nobo dedica na entre otro educa y envolv’e comunidad local tocante Aruba su medio ambiente, naturalesa, conservacion, herencia cultural, desaroyo sostenibel, salubridad

y nan conexion vital y mucho mas.

Awe, diaheubs 27 di maart 2025 pa 7:00pm e prome episodio “Naturalesa y su importancia” lo ta obtenibel riba rednan social di DNM como tambe riba plataformanan di Youtube y Podcast. E serie, “Cadushi ta zona cu Dyrick”, ta presenta door di Dyrick Wouters, un

hoben curioso y pasiona cu Aruba su naturalesa y herencia cultural. Nos ta invita grandi y chiquito pa sintonisa e serienan aki y asina bay riba un biahe hunto cu Dyrick, cu ta explora Aruba su biodiversidad, tradicion, esfuerzo pa conservacion y retonan ambiental. Den e prome episodio Dyrick ta combersa cu sr. Gisbert Boekhoudt-



Director, Yahaira Jansen-Onderzoeker y Nadine Da Silva- Beleidsmedewerker na DNM. E combersacion ta bay over Aruba su Naturalesa y su importancia. Sigur un episodio hopi interesante cu ta captura atencion.

E podcast ta disponibel entrante awe 7:00pm riba plataformanan manera Spotify, Apple Podcast, tambe riba e rednan social manera Facebook, Instagram y YouTube channel di DNM. E fantastico di e podcast ta cu por bay scucha of wak e episodio aki ora ta conveni

bo. Ta encurasha un y tur pa bay ‘subscribe’ na e canalnan di DNM riba e diferente plataforma nan menciona pa asina no perde niun episodio di “Cadushi ta zona cu Dyrick”. Lo tin un episodio nobo cada dos siman riba diahuebs pa por scucha of wak, Asina bo tambe por haya sa mas di Aruba su ecosistema unico, con pa conserva nos fauna, efecto di cambio di clima pa Aruba y con turismo sostenibel ta beneficoso Aruba y con esakinan ta aporta na mantencion di nos identidad cultural, y hopi mas.

CHAUFFEUR A RABIA PASOBRA A DUNA UN OTRO AUTO UN CHENS Y TA ZUNDRA!

Diaranson mainta durante di un accidente ora cu chauffeurnan no por hala nan auto te ora duna nan instruccion pa hala esakinan, un chauffeur a rabia pasobra a duna

un otro auto un chens y a start un problema unda reclamonan pisa a cay.

E insultonan aki no ta yega leu, practica cortesia y amabilidad.



JAMES FINIES TA KONDENÁ POLITIKONAN DI BONAIRE PA TRAISHON DI DESEO DI PUEBLO DESDE 10-10-10.



E walkout resiente di representantenan politiko di Bonaire, Sint Eustatius, i Saba na Den Haag ta un señjal kla di inkompetensia, ya ku nan ta subordiná bao di Den Haag. Pero esaki ta bini demasiado lat i ta karese di kompromiso real pa e deseo di e di pueblo Boneriano kual a impone riba e pueblo e leinan WolBES i FinBES i leynan kontroversial i inmoral desde 10-10-10 kaba.

E mes politikonan ku ta protesta awe ta e mesunan ku na 2017, a akordá den Konseho Insular di Bonaire pa Bonaire wordu ankra den Konstitushon Hulandes sin derecho igual sin konsentimentu di pueblo. Daisy Coffie di M21 i Cyrill Vrolijk di MPB, dos lider politiko ku a kampaña públikamente pa e voto "Sí", referendum 18 di Desèmber 2015 ku e pregunta: "Bo ta di akuerdo ku e status aktual", pa mantene e status ku nan ta protesta kontra awe. Clark Abraham, ku a pretende di ta na banda di e voto "No",

a traishoná tur ku a vota No, traishona su propio partido DP, a bandona Demokrát, a tumba su mes gobierno, a lanta su propio Frakshon Liberal, i a uní ku e kampañadonan di voto "Sí" ku a perde referendum. Ironia total ta ku ta e mesun polítikonan aki a ignora e resultadonan i a traishoná e 66% di Boneriano ku a votá kontra integrashon Hulandes den e referendum ku James Finies, a lucha 222 dia nonstop pa logra.

Mientras ku e polítikonan insinero aki ta pretende di ta protesta kontra desishon unilateral di Den Haag, nan ta e mesunan ku a bende autonomía di Bonaire. Nan hipokresía ta evidente. En bez di berdaderamente defendé e derecho fundamental di pueblo di Bonaire di auto-determinashon, nan a permiti i hasta yuda polítikonan Hulandes sin eskrúpulo for di Den Haag pa ignora i viola e derechonan humano di Bonerianonan, ku a hiba nos na e mesun opreshon ku nan pretende di

protesta kontra dje awe. James Finies a sakrifika su libertad, a sobreviví tres intento di asesinato, i a sufri pa enkarselashon ilegal dor di ordu di egzaghebber Edison Rijna I su sosionan, tur esaki riba e kaminda pa buska sosten di Nashonan Uni pa pone Bonaire riba e lista di protekshon di Teritorionan-Sin-Propio-Gobernashon, tur esaki den e lucha pa derechonan fundamental di pueblo di Bonaire.

E lucha pa respet di derechonan fundamental humano i autodeterminashon di e pueblo di Bonaire ta kontinuá, i lo no keda den man di e polítikonan ku a traishoná nan propio pueblo. E pueblo ta demanda respet real pa su derechonan, konforme ku Charter di Nashonan Uni i Tratadonan di Derecho Humano, no protesta fingi di esnan ku ta komplise na e pueblo su subyugashon kolonial.

Yamada na Tur Ku ta Kere den Kambio Esaki ta un invitashon

habri pa aktivistanan, profeshonalnan, lidernan di komunidad, i siudadanon preokupa ku ta ninga di asepta opreshon i inhustisia. Si bo tapashona tokante derecho humano, progreso politiko, of transformashon sosial, tin un lugá pa bo den e movimiento aki.

Ken Nos Ta:
Pueblo Progresivo Uni – Un partido politiko nobo i progresivo – Fundá pa James Finies, Robert Strickx i Marjolein Finies James Finies ta un defensor fuerte pa derecho humano di Bonaire na nivel internashonal. Finies a liderá Bonaire i a papia na Nashonan Uni, a denuncia atosidadnan di Hulanda na Komite C24, a reklama na e Sekretario General di Nashonan Uni, a hasi keho ofisial na e Alto Komishonado di Derecho Humano di Nashonan Uni kontra violashonnan di derecho humano di parti Hulanda. Finies ta aktivamente luchando pa Bonaire wordu poné riba lista di Nashonan Uni di Teritorionan-Sin-Propio-

Gobernashon.

Bonaire Human Rights Organization – Presidente: Davika Bissessar Shaw – E uniko NGO na Bonaire ku tin Status Konsultativo Especial di Konseho Ekonomiko i Sosial di Nashonan Uni i ku ta Miembro Asosia di Komishon di Reparashon di CARICOM.

Movimentu Pa Kambio di Sociedad Sivil – Fundá pa Sedney Marten i Kaile Finies – Tur ku ta kere den kambio i no ke ta den e frente di partido politiko, pa konsientisa, aspirando demokratisashon, transformashon sosial, ekonomiko, edukativo i politiko.

**PUEBLO A HAÑA SU
PEN BEK**

Pa kualkier informacion
solodipueblo@gmail.com
of
585-9500

AUTO RIJSCHOOL BENNETT TA LAMENTA FALTA DI CONSULTA DI KPA DEN CAMBIO DI MANEHO RIBA EXAMEN DI RIJBEBWIJS

Auto Rijschool Bennett cu ta e rijschool di mas grandi na Aruba. E aña aki e ta cumpli 42 aña di existencia y e ta sinti su mes yama pa reacciona ariba e maneho cu KPA, pa loko ta trata e procedura di inscripcion pa por pasa e examen di rijbewijs pa por core un vehiculo di motor.

Dialuna 24 di maart 2025 nos school a ricibi un e-mail for di e Coördinator Unit Examen Rijbewijs di KPA, un carta fecha 20 maart 2025, sin topico. Den e carta ta informa nos, cu, entrante awe 24-03-2025 e maneho di Oficina di Rijbewijs a cambia.

Cu Cuerpo Policial tin falta di Polis ta conoci, pero aki ta trata di trabao administrativo cu no ta rekeri un Agente Policial pa hasi esaki. Prome cu Covid-19, e departamento di rijbewijs tabata hopi druk cu publico cu tabata bay n'e Oficina di Rijbewijs na Santa Cruz pa:

1. Pasa examen di rijbewijs
2. Traha rijbewijs nobo of pa
3. Renoba e rijbewijs.

E rij largo cu antes tabatin na e departamento di rijbewijs a keda completamente elimina ora cu Censo a tuma e trahamento y renobacion di rijbewijs over, for di KPA.

Si compara e actividadnan di e Departamento di Rijbewijs awo cu e periodo prome cu Censo a keda encarga cu e trahamento di rijbewijs, bo por bisa cu practicamente no tin movecion di hende eyman.

Desde di e Pandemia di Covid e Departamento di Rijbewijs a para tur hende pa yega eyman sin traha un cita prome via un email. A limita e rijschoolnan pa entrega peticion pa nan alumnonan por pasa examen pa rijbewijs. Antes e rijschoolnan por a yega tur dia durante di ora di oficina. Despues a limita esaki pa solamente un bes pa siman anto pa e ora cu a wordo stipula. Ariba dje a limita e cantidad di candidato cu bo por entrega na un maximo di 5 despues a aumenta esaki na 10. Den e ultimo Carta di Maneho di KPA a bin cu ultimo exigencianan.

1. E rijschool por entrega solamente 5 peticion ariba e dia stipula pa nan.
2. Si un candidato kier pasa examen pa mas categoria di rijbewijs, por ehempel pa A.Brommer, B.Auto, C.Truck, D.Bus y C.Trailer esaki ta wordo considera como 5 peticion y como scol no por haci peticion pa ningun candidato mas.

Cu otro palabra, ta pa un persona so por haci peticion pa e siman ey

3. Mester entrega e peticion pa pasa examen cu un paspoort of cedula original. No ta acepta un copia.

COMENTARIO

Segun e reglanan di examen ta ora di pasa examen mester presenta cu un documento original. Den curso di varios aña mi a experiencia cu a perde varios documento na Oficina di Rijbewijs. Como rijschool, ami no kier carga e responsabilidad di un documento y mi no ta kere cu e ta consehabel

pa un departamento di Gobierno exige esaki. Tin un motibo pakico e candidatonan ta haci uzo di e servicio di e rijschool pa pidi un fecha di examen pa nan. Hopi di nan ta traha durante e orarionan di e Oficina di Rijbewijs. Pa tur e tramitenan aki, hopi di nan tin cu pidi un mita dia di vakantie di e poco dlanan cu nan ta haya pa aña.

Concluyendo mi ta conseha KPA pa consulta prome of dialoga cu e schoolnan concerni prome cu tuma un medida asina




drastico, cu ta afecta tur rijschool y esnan cu ta hasi e esfuerso pa purba haya un rijbewijs. Como ex-polis mi a spera mas profesionalismo di parti

di KPA y sigur di parti di Alto Comisario Arnhem.

Charles E. Bennett
Proprietario Auto Rijschool Bennett



**Prome Congreso
Catolico Aruba**
**Diasabra 03 di Mei
2025**



Michael Nicolaas
Diacono - Aruba



Pedro Duarte
Pastoor - Korsou



Rodrigo Jaramillo
Fundado
Lazos de Amor Mariano
Colombia

**Centro San Martin,
St Cruz. Aruba**
Edad minimo: 8 aña

Cuminsa: **8:30 am** (Registracion)
Termina: **5:00 pm**

Early Bird: Fls. 30

(Te dia 03 di April)

Ta inclui Breakfast Bites + Light Lunch

Aruba Bank #6016030190. Fundacion Lazos di Amor Mariano.

Manda bo recibo y mas informacion via:

WhatsApp 699 5669



**LAZOS DE AMOR
MARIANO**
Totus Tuus
ARUBA

PAP

Cas di Cultura Ta Trece ‘E
Brasa MFA Road Show’ pa
Comunidadnan Rond Aruba



Oranjestad, Aruba – 27 di Maart 2025 – Cas di Cultura a lansa oficialmente su ‘E Brasa MFA Road Show,’ treciendo su vision pa futuro directamente pa comunidad. Despues di e prome sesion na MFA Noord dia 26 di Maart, e tour lo sigui den henter e localidadnan di MFA di Aruba y Scol di Arte, ofreciendo e publico un oportunidad pa siña mas tocante e plannan di renobacion, hasi pregunta, y descubri maneranan pa contribui.

Fechanan y Oranan ta lo siguiente:
MFA Paradera – Diaranson 16 di April | 6:00 PM – 7:30 PM
MFA Sta. Cruz – Diaranson 7 di Mei | 6:00 PM – 7:30 PM (Cu Gerbrand Borgdorff di Theateradvies BV pa un discusion riba facilidadnan y inventario di teater, y tambe un Q&A riba experencianan di publico na Cas di Cultura.)
Scol di Arte – Diaranson, 28 di Mei | 7:30 PM (Ora di inicio mas laat pa e sesion aki so.)

MFA Savaneta – Diaranson 11 di juni | 6:00 PM – 7:30 PM

E sesionnan publico aki lo duna bista riba e transformacion di e teater nacional di Aruba, incluyendo detayenan di renobacion, liñanan di tempo, y e impacto riba e comunidad di arte y cultura. E asistentenan lo siña tambe con nan por sostene e proyecto a traves di donacion y contribucion.

Cas di Cultura ta invita tur hende—artista, amante di cultura, y miembronan di comunidad—pa forma parti di e trayecto aki. E proyecto E Brasa ta mas cu un renobacion; e ta un esfuerzo colectivo pa conserva y engrandece un espacio cu pa generacionnan largo tabata central den e bida cultural di Aruba. Pa mas informacion por bishita www.casdicultura.aw of sigui nos riba nos rednan social.

EN
Cas di Cultura Brings ‘E Brasa MFA Road Show’ to Communities Across Aruba
Oranjestad, Aruba – March 27, 2025 – Cas di Cultura has officially launched its ‘E Brasa MFA Road Show,’ bringing its vision for the future directly to the community. Following the first session at MFA Noord on March 26, the tour will continue across Aruba’s MFA locations and Scol di Arte, offering the public an opportunity to learn more about the

renovation plans, ask questions, and discover ways to contribute.

Upcoming Tour Dates & Times:

- MFA Paradera – Wednesday, April 16 | 6:00 PM – 7:30 PM
- MFA Sta. Cruz – Wednesday, May 7 | 6:00 PM – 7:30 PM (Featuring Gerbrand Borgdorff of Theateradvies BV for a discussion on theater facilities and inventory, as well as a Q&A on audience experiences at Cas di Cultura.)

- Scol di Arte – Wednesday, May 28 | 7:30 PM (Later start time for this session only.)

- MFA Savaneta – Wednesday, June 11 | 6:00 PM – 7:30 PM
These public sessions will provide insight into the transformation of Aruba’s national theater, including renovation details, timelines, and the impact on the arts and cultural community. Attendees will also learn how they can support the project through donations and contributions. Cas di Cultura invites everyone—artists, cultural enthusiasts, and community members—to be part of this journey. The E Brasa project is more than a renovation; it is a collective effort to preserve and enhance a space that has been central to Aruba’s cultural life for generations. For more information, visit www.casdicultura.aw or follow us on our social media channels.

SUDOKU

8			3					
3					5			
		9	1		4			
	4			8		7		
6								2
		8		2			3	
			7		9	6		
			2					5
					8			4

		9	8				4	
4				5				
			7	1				9
						8		1
	5	8				4	7	
6		3						
5				7	1			
				4				2
	7				9	1		

		7	1				5	
				7	4	8		
	2		3	8			7	6
				4	8		1	9
		8				5		
6	9		5	3				
8	7			1	9		3	
		3	8	5				
	1				3	9		

CHAUFFEUR DI UN HYUNDAI TUCSON NO A REGULA SU VELOCIDAD NI A MANTENE DISTANCIA A BAY DAL E CHANCHAN DI UN CHANGAN

Diaranson mainta a drenta informe di un accidente riba e caminda di Paradera, mesora a dirigi un patruya na e sitio.

Na yegada di e patruya a bin compronde cu aki ta trata di un accidente unda cu e chauffeur di un Hyundai Tucson no a

regula su velocidad ni a mantene distancia a bay dal tras di un Changan. Afortunadamente ningun hende a resulta herida.



Cu bista riba participacion na diferente evento y e weganan ASU2025



Federacion di Taekwondo ta splica nan plan tecnico pa aña 2025

Durante un reunion cu presidente di Aruba Taekwondo Bond (ARTBO) y entrenador Nacional Teofilo Rodriguez, miembronan di Direccion di Deporte a combersa y delibera riba e situacion actual y e plan di entrenamiento pa cu e atletana di Taekwondo.

E enfasis di e programacion pa e aña aki ta e clasificacion y participacion na e weganan Panamericano



Junior "ASU2025" cu lo tuma lugar augustus benidero na Asuncion-Paraguay.

Pa e evento aki, atleta

Maelynn Fradl ta den pleno proceso di clasificacion, unda cu e ta den campo di entrenamiento na Mexico den preparacion pa e

ultimo clasificatorio otro luna.

Banda di esaki a papia riba e desaroyo di e atletanan youth/junior, unda tin varios lo bay participa un evento di

"cadet" pa asina sigi traha riba nan nivel como atleta di Teakwondo. COA ta desea tur atleta y e federacion hopi exito cu nan procesonan deportivo. #TEAMARU

Gradicimento/Invitacion

Den number di su juinan, rumanan y demas famia kier a duna un palabra di gradicimento na tur esnan cu di un of otro forma a mustra nan atencion y duna sosten y ayudo durante enfermedad di e defunto y na tur esnan cu a companja nos na e acto di entierro di nos ser stima:



Sra. Viuda Margriet Jansen Lacle

Boso muestra di atencion y sosten ta di hopi aprecia y un gran consuelo pa nos.

Tambe nos ker a duna un danki special na: Hospice Atardi pa e cuido ricibi cu hopi amor y carinjo.

Aurora Funeral Home pa e trato y servicio duna na nos defunto stima.

Grupo Kawara pa nan bunita poesia y canto

Alaves nos kier invita pa asisti na tres Santo Sacrificio di Misa cu lo tuma lugar na Misa Santa Filomena na Paradera, diana 25, 27, 29 di maart pa 7or di anochi pa descanso di alma di nos defunto stima.

E BON NOTICIA

PAKIKO E SECTANAN NO TA STIMA Y NO TIN DEBOCION NA MARIA?

Den Bijbel Genesis 3: 14-16, Dios Tata a bisa na e colebra satanas: “Lo Mi trece enemistad entre abo y e muher, entre bo descendiente y entre e descendiente di e muher. E muher cu su descendiente lo trapa riba bo cabes y lo bo lastra bao di su pia.” Akinan e muher ta Maria, cu a obedece Dios y a acepta di ser Mama di E Salvador. Maria Su descendiente ta, Cristo-Hesus y tur e sigidornan den Cristo-Hesus Su Iglesia. E descendiente di e colebra satanas ta esnan den secta cu no ta acepta Maria y ta persigi Cristo-Hesus Su Iglesia. Den Bijbel Revelacion 12: 17: “Anto e dragon a rabia contra e muher y e’l a bai hasi guera na e demas yiunan di e muher.” Akinan e diabel tin rabia riba Maria y e diabel ta persigi y ataca e yiunan di Maria den e Iglesia di Cristo-Hesus. Den Bijbel Lucas 1: 41-43, akinan Maria a bishita Su prima Elizabeth y Elizabeth a keda yena cu Spirito Santo y a bisa: “Di unda mi ta merese e honor cu Mama di mi Senjor ta bishita mi?” P’esey Maria

ta wordo yama Mama di Dios, pasobra Su Yiu Hesus ta E di dos Persona di E Santisima Trinidad. Y den Bijbel Huan 20: 28, akinan Apostel Thomas ta expresa na Hesus: “Mi Senjor y Mi Dios.” Akinan e palabra Senjor ta significa Dios, pesey Maria ta Mama di Dios. Den Bijbel Huan 19: 25-27, akinan Hesus na Crus klaba a bisa: “Mama, ata bo yiu eynan y despues E’l a bisa Huan: Ata bo Mama eynan.” Akinan Hesus ta ofrece nos Su Mama Maria, pa nos stimel’E, pa nos honrel’E y pa nos acepta Maria como nos Mama. Manera cu e Apostel Huan a acepta Maria como su Mama y e Apostel Huan ta representa e Iglesia di Cristo-Hesus, pesey Maria ta Mama di Iglesia. Den Bijbel Revelacion 12: 1, ta bisa: “Un senjal grandi a aparece na Cielo: un Muher bisti cu solo, cu luna bao di su pianan y riba su cabes un corona di diesdos strea.” E Muher bisti di solo ta Maria y e corona di diesdos strea ta simbolisa, e oficio Real den Reino di Cielo. E significacion di solo, luna y streanan, den Bijbel Genesis 37: 9-11,

akinan e Profeta Jozef ta sonja di mira con, solo, luna y streanan ta buig su dilanti y esaki ta simbolisa, Reinado y Autoridad. Den Bijbel 1 Reynan 2: 19-20, ta bisa: “Ora cu Betsabe, e mama di Rey Salomon a dreña den e sala di e Rey, pa papia cun’e ariba asunto di Adonias, e Rey a lanta pa ricibi su mama y a buig su dilanti. Despues e’l a bai sinta riba su trono y a duna ordo pa nan trece un stoel di trono pa su mama, e mama a sinta na man drechi di su yiu Rey Salomon y a bis’e: Mi kier a pidi bo un fabor chikito, mi no ta spera cu bo lo nenga mi. Rey Salomon a contesta: Mi mama, pidi mi loke bo kier, lo mi no nenga bo.” Akinan e mama di Rey

Salomon a haya un trono, pa sinta na man drechi di su yiu Rey. Tambe Betsabe a pidi su yiu Rey Salomon fabornan pa Adonias y Rey Salomon a contesta su mama: “Mi mama, pidi mi loke bo kier, lo mi no nenga bo.” Akinan Betsabe tabata abogada y intercesora pa Adonias y pa otro nan. Akinan tambe Maria a intercede, pa e pareha recien casa na boda di Cana na Galilea na unda cu binja a caba, Bijbel Huan 2: 1-10. Mama Maria den Cielo ta nos abogada y intercesora pa tur Su yiunan den Iglesia di Su Yiu Hesus y Hesus Rey di Universo, lo no nenga Su Mama fabornan. Conclusion: Na ora di nos morto, nos tur tin cu presenta individualmente

dilanti di tribunal den Cielo pa ser husga, dilanti di trono di Hesus Rey di Universo. Awor, na esnan den secta cu no a acepta Maria, ta ken bo ta kere di mira tambe sinta na Su Trono na man drechi di Rey Hesus? Wel, lo bo mira Maria sinta na Su Trono, como Reina di Cielo y di Tera, bisti cu Solo, Luna bao di Su pianan y riba Su Cabes un Corona di diesdos Strea. E prome palabra cu Hesus Rey di Universo lo bisa bo ta, bo a honra Mi Mama, bo a venera Mi Mama y bo a stima Mi Mama, manera Mi ta stimel’E? Tambe Hesus lo bisa bo, Mi a ofrece bo Mi Mama, den agonía na Crus klaba, lesa Bijbel Huan 19: 25-27. Nunca no ta laat pa sa e berdad y pa cambia bida.

Clasificados

SOLODIPUEBLO@GMAIL.COM

CEL. 585 9500

Oracion di dia

Un feliz comienso di weekend colma cu hopi amor y bendicion di Dios.

Stima Señor, bo Dios, di henter bo curason, cu henter bo alma, cu henter bo mente, y cu tur bo forza. E di dos mandamento mes importante: “Stima bo prohimo manera cu bo ta stima bo mes. No tin ningun otro mandamento cu ta mas importante cu esakinan.” (Marco 12, 30-31)

Dios a crea bo segun su imagen, a duna bo e mesun capacidad pa stima, a supla den bo e mesun rosea di amor. Si bo ta cristian, bo tin cu tuma e antorcha di amor for di Cristo, charge cendi durante henter bo bida, y pase despues na bo yiunan, na bo amigonan y coleganan. E antorcha di amor aki tin cu pasa di man pa man, tin cu cende cas pa cas, ilumina curason pa curason y mente pa mente. Scuridad tin miedo di e antorcha di amor aki. Unda e antorcha aki ta cendi scuridad ta dirti bira nada, manera pida ijs. T’esaki ta amor: no ta nos a stima Dios prome, sino t’E a stima nos y a manda su Yiu pa E bira sacrificio pa pordon di nos picanan. (1Huan 4,10) Solamente ora bo ta descubri e tesoro cu ta den bo paden cu yama amor y solamente ora bo ta entrego na otro, lo bo ta feliz.

Oracion: Señor guia mi y proteha mi den Bo cosnan di haci di tur dia. Pa bo Amor ta semper hunto cu mi. Bo promesa ta real! No obstante ki tribulacion mi haya mi aden, mi sa cu Dios no ta laga mi bandona, den number di Hesus di Nazaret. Amen.